

Szene 1

Saallicht geht aus.

Man hört eine U-Bahn einfahren. Es ist fast dunkel. Während die U-Bahn ein- und ausfährt betreten drei Personen mit Taschenlampen die Bühne. Sie scheinen etwas zu überprüfen.

1.1 Alles sauber

Dolly Alles clean, Mile.
Camden Bi mir au.
Mile Kontrollierid de Holzverschlag of Abhörgrät.
 (gehen hin und kontrollieren ihn)
Dolly Do isch au nüt.
Mile Camden?
Camden Nüt.
Mile todsicher?
Dolly&Camden Wo bliibt dis Vertroue...
Dolly ... i eusi Arbet?
Camden Händ mir dich scho irgend einisch enttüscht?
Mile Möchid ihr das äxtra.
Dolly & Camden Was?
Mile Genau das. Mitenand s'Gliiche säge.
Dolly & Camden Passiert halt...
Camden ...eifach.
Mile (schüttelt den Kopf, überlegt)
 Denn chan ich Entwarnig gäh?
Camden Sicher isch, dass nüt sicher isch.
Mile (schaut die beiden verdutzt an.)
Dolly Aber do inne isch sicher sicher.
Mile (greift nach ihrem Handy)
 Beth? Bi eus alles suber. Häck di in Stromchreis ii, damit s'do Tag
 wird. Okay. Ich warte.
 (das Licht geht an.)
Mile Ändlich.
 Beth. Alles okay. D'Aldwych Station ghört wieder eus. Bis glii.
 (legt auf)
Camden Das isch de Bulle doch langsam piinlich.
Dolly LÜütet immer wieder en U-Bahn Pändler a, dass er s'Gfühl hett,
 die längscht gschlossni Aldwych Station a de Piccadilly Line sell
 bewohnt sii.
Camden Ond jedes Mol, wenn d'Bulle do uftauchid, isch nüt.
Mile Mir sind ihne immer en Schritt voruus.
Dolly En Schritt!
Camden Mir sind dene Meile voruus!
Dolly Das isch jetzt s'dritte Mol gsii innerhalb vo eim Monet, wo sie
 d'Aldwych Station sind go dorsueche.
Camden Die chömid sich doch vor wie Geischerjäger.
Mile Eus chas rächt sii. Je weniger Bulle, je meh Freiheit.
 (die drei klatschen sich ab)

1.2 Back to normal

Die Restlichen der Gang trudeln ein. Jeder hat irgendwas dabei, um es sich gemütlich zu machen. Man will sich einrichten.

Bella Es sitzt no niemer ab!
Beth Mir zwee müend no de letschti Checks mache, dass wörklich alles suuber isch.
Freya Ändlich wieder i eusere Aldwych Station. Nor scho dä Doft isch onverglichlich.
(Black umarmt ihre Schwester. Beide atmen tief ein.)
Silver Wörd Oldbitch Station ned besser passe?
Cristal Was hesch du eigentlich immer?! Ond abgseh devo, sind mir sitt em 28. Januar nid nor Bitches.
Silver Oh sorry. Wie han ich das nor chönne vergässe?!
Black Will du dä Typ do ned wotsch akzeptiere.
Aber merk dir eis: Die einzigi Konstante isch d'Veränderig. Au do i dere Gang. Ob's dir passt oder ned.
Cristal Dä Satz mit de Konstante, isch dä vom Aristoteles?
Black Nei, Heraklit.
Angel (hält ein Handy in die Luft)
Ich ha do öbrigens no öppis.
Marble Driischiss, Angel. Es interessiert sich grad im Momänt keine för dini Chlausocht.
Angel Aber luegid doch emol das Handy, ...
Blue ...Angel! Immerhin emol keis Köfferli! Du machsch Fortschritt.
(reisst ihr das Handy aus den Händen.)
Chef. För dich.
(zu Angel)
Mir sind öbrigens grad ame ganz andere Thema.
Leyton Bitte ned scho wieder die Diskussion om Möps oder Schniedel.
Mir händ de Ham i eusi Gang ufgnoh ond fertig.
Dolly Aber ned eistimmig.
Mile Das spillt überhaupt kei Rolle, Dolly. Bi eus wird jede Entscheid demokratisch troffe. D'Mehrheit isch devör gsii. Amen.
Camden & Dolly Ond d'Mehrheit isch au ...
Dolly Sorry.
Camden Ond d'Mehrheit isch au devör gsii, dass mir mit 16 Mitglieder s'Ändi vo de Fahnestange erreicht händ. 16 sind gnueg!

(Reaktionen aller)

Brix Aber abgseh devo: De Ham hett sich zome exzellänte Dieb entwickelt. So Talänt wie lhn hett mer nie gnueg.
Ham Merci, Brix.
Ich finds geil do. De einzigi Typ i de «angry girls» Gang.
Cristal Und ich erscht!
(umarmt ihn)
Bella People! Alles Vire frei do inne!
Beth Möchid's euch gmüetlich!

(Man macht es sich gemütlich)

Cristal (zu Silver)
Was isch eigentlich mit dir los? Wieso hacksch du anduurend of em Ham ome wie nes Zombi Huehn?

Silver
Ham Ohhhh. Ghör ich do so öppis use wie lifersocht?
Loh sie doch, Crystal. Du hesch mir s'Läbe grättet ond das wird ich dir nie vergässe. Alles andere isch onwichtig.

Angel (zu Mile)
Mis Handy.

Mile
Angel Ned jetzt, Angel!
Wenn denn?

Blue Marble, wie gseht's us. Eusi Röckkehr müesstid mir doch mit eme Fäschtässe fiire.

Marble Oh yes. Blue und Marble gönd of Containertauchgang in London. Gitt's Wönsch?

ALLE (rufen Essenswünsche durcheinander)

Marble STOPP! So sicher ned.
Blue Oder wänd ihr alli verschimmlets Toast Brot?
Black Momänt. Wo isch eigentlich d'C.G.?
Camden Die suecht doch ned öppe weder noch neue Mitglieder?
S'Boot isch voll!

Dolly Sie hett mir gseid, sie surft no e Rondi U-Bahn.
Camden Denn isch jo guet.
Leyton Was! Das isch ebe ned guet! Ohni mich! Of welere Linie?
Dolly Victoria Line.
Leyton What the F...
Brix ...chills, Leyton. Sie darf doch au mol öppis ohni dich mache.
Leyton Im U-Bahn Surfe sind mir Seeleverwandti, Brix. Wenn mir das ned zäme machid, fühlt sich das a wie Cola trinke ohne Cholesüüri.
Brix Proscht Nägeli!
Wenn sich das so afühlt, denn isch sie sicher glii zrogg.

1.3 C.G. taucht auf

C.G. erscheint. Im Schlepptau ein neues Gesicht. Es ist Water.

Brix Was han ich gseid?!

C.G. (zu Water)
Jetzt chomm scho. Do passiert dir nüt.
Water Ond wenn mer mich ned gern hett?
C.G. Schlimmer als det, wo du her chonnsch, chas jo ned sii, oder.
Water (nickt)
C.G. (schleppt Water zu den anderen)
Leyton Du surfsch eifach ohni mich i de Tube!
Wer isch denn das?
C.G. Es neus Mitglied.
Camden & Dolly Was?!

(Reaktion aller. Man stellt sich in einem Halbkreis um die Neue.)

Camden Es neus Mitglied.
Dolly Du weisch genau, was mir abgmacht händ.
C.G. Usnahm.
Blue Usnahm? Isch das eigentlich dis Lieblingswort.
Ham Jetzt lönd sie doch! Mir müend doch zerscht emol wösse, was überhaupt passiert isch.

Silver Ham. Du bisch wie nes Chinderei. Du stecksch voller
Öberraschige!
Ham Bis doch ruhig!
Cristal (zu Silver)
Ond du bisch nüt anders als en Giftsprötze! Händ's ned i de USA zwenig Serum för Todeskandidate. Mäld di det!

(Silver geht auf Cristal los. Ham und einige andere reissen die beiden auseinander.)

Mile Fertig!
(Die Gemüter beruhigen sich ein wenig.)
Dolly Aber d' C.G. cha ned eifach e neu i euses Gheimversteck schleppe ond eus for nackti Tatsache stelle.
C.G. Was heisst do eifach is Gheimversteck schleppe? Ich has sie mit verbondne Auge do he gfüert. Wie euch au. Sie hett kei Ahnig, wo sie isch. Han ich rächt?
Water Vollkomme rächt.
C.G. Also!
Bella Wo hesch sie gfonde?
C.G. & Water Waterloo Station.
Bella Wär die Erscht vo det.
Black Das isch doch jetzt Näbesach. Es goht om d'Existenz vo eusere Gang. 16 sind gnueg. Kapiert. Mir händ's beschlosse.
Angel Alli händ es rächt aglost z'werde.
Marble Es gitt aber ei Usnahm!
Angel (schaut sie fragend an)
Ond die wär?
Marble Dini Köfferli ond Handys lohsch us em Spiil.
Angel Ich ha jo gar nüt gseid.
Water Es isch immer s'Gliche. Det won ich uftauche gitt's Ärger.
C.G. Easy. Gib mir no zwee Minute. Wenn d'Honger hesch ond du stohsch ohni Gäld voreme Automat, gheid s'Ässe au ned eifach use. Do muesch scho chli noche hälfe.

Brix Aber sind mir ehrlich. Of eini meh oder weniger chonnt's au nömme a.

Beth Platz hättid mir gnueg.
(zu Silver und Cristal)
Ond sie gseht ned so us, als ob sie schlächti Stimmig wörd verbreite.

Cristal Ich ha ned agfange!
Silver Aber ich ha agfange! Ond ich stoh dezue. Das isch doch kei Schand, Beth! Mir muess jo ned alles Frässe wo eim uftischet wird, oder.

Mile Aber mer chotzt au ned eifach über de Tisch, wenn eim s'Ässe
ned passt!
(Stille)
Freya.
Freya D'Black ond ich händ die Gang for fascht eme Jahr gründet.
Mir händ s'Zämeläbe i de Gang Rules klar festgleit. Mir wössid,
wie mir i dem Fall müend verfare.
Black Denn halt.
Schritt 1 vo de Gang Rules: Vergangeheit.
Alle Nor wer sini eignig Vergangeheit könnt, cha sich i anderi ifühle.

Ev. Musik
LICHTWECHSEL

Szene 2

Alle stellen sich in einer Linie auf, ausser Water. Sie setzt sich vor den anderen auf den Boden und hört sich alles an.

2.1 Vergangenheit

- Freya Freya.
D' Black ond ich händ a de U-Bahn Station Blackfriars beschlosse, es neus Läbe azfoh. Sett denn heiss ich Freya. Also abgeleitet vo Friars. D' Black ond ich sind Schwöschtere, eigentlich Halbschwöschtere. Ich ha miterläbt, wie min Vater de Chopf vo eusere Muetter so lang gäge Törrahme gschlage hett, bis...
- Black ...Black. De Freya ihri Halbschwöschter.
Bi eus deheim hett nor Psychoterror gherrscht. «Wenn du dinere Lehreri öppis seisch...» «wenn du zor Polizei gohst...» «wenn du ned schwiigst, denn goht's dir gliich wie dinere Muetter.» Mit em erschte Schritt i die verlassnig Aldwich Station hett för mich es neus Läbe agfange. Sitt denn gitt's för mich nor no die Gang ond mini Sis.
- Mile Mile. Uf gläse worde a de Station Miles End. Min Schicksalsort. Mini Muetter hett mich als Findelchind a dere Station usgsetzt. Ich bin es ziiitli lang s'berühemtichte Baby vo ganz London gsii. Aber denn bin ich vo Pflegefamilie zo Pflegefamilie gschobe worde, will ich eifach ned so gsi bin, wie mer mich hett welle. Vor knapp nün Mönat hett mich d'C.G. a de Miles End Station gfonde. Wie gseid: min Schicksalsort.
- C.G. Station: Covent Garden, eigentlich C.G., aber C.J. tönt vell fetter.
Ich rede ned über mini Vergangeheit. Ich bin os em Heim abghaue; mit em Auto vo de Heimleiteri. De Chare han ich i de Themse versänkt. Die Frau hetts verdient. Fetti Aktion gsii. D'Freya hett mich denn im Covent Garden uf gläse ond mir es neus Dehei gäh.
- Beth Beth. Station Bethnal Green
Ich bi mir immer vorcho wie en Wassertropfe i de Wüesti. Ich bin abghaue zom s'Meer go sueche. Jetzt han ich's gfonde, do i dere Gang.
- Bella Bella. Station Belsize
Im Heim hett mer mich verdächtiget, es Huus azündet z'ha. Was überhaupt ned stimmt. Aber mis Alibi isch ned usreichend gsii. Ongerächtigkeit verträgt ich gar ned. Also bin ich weg. Ond a de Belsize Station isch alles andersch worde.

Ham	<p>Ham. Station East Ham</p> <p>Ich ha mir welle s'Läbe näh. Ich ha eifach ned i d'Karriereplän vo mine Eltere passt. Ich bin im Winter i die iisig Themse gspronge ond a de Station East Ham weder zo mir cho. En Ängel hett mich grettet.</p>
Angel	<p>Angel. So heisst au d'Station, wo mer mich gfonde hett, aber ich bin ned im Ham sin Angel.</p> <p>Scho mol im Hakkasan am Hanway Platz 8 in London gsi? Das ghört eusere Familie. Min Brüeder hett mich die ganz Ziit gschlage ond niemer hett mir glaubt. Er isch immer s'Vorzeigechind i gsii. Ond ich? «Du muesch nor hürote.» «Das isch gnueg.»</p> <p>Ned för mich.</p>
Brix	<p>Brix. Brixton Station.</p> <p>Mobbing. I de Schuel. Aber ned eifach so es bitzeli Mobbing. Richtig Mobbing. So wie de Onderschiid zwösche Ritze ond Sälbstmord. Zom Glöck hett mich d'C.G. os dem Dräck use zoge. Es isch knapp gsii. Extrem knapp.</p>
Silver	Silver. Silvertown Station.
Cristal	Ich bin im Fall dra.
Mile	Cristal!
Cristal	Isch doch wohr.
Silver	Also, nomol.
	<p>Silver. Silvertown Station.</p> <p>Ich ha am Friitig am 13. min Klasselehrer bewosstlos gschlage. Das hett sini Grönd gha, aber ich ha jo gwösst, dass mir die niemer glaubt. De Schuelleiter ond mini Eltere scho gar ned. Fünf Täg spöter bin ich's 12. Mitglied vo de Gang worde.</p>
Cristal	<p>Cristal. Cristal Palace.</p> <p>Hass Chind. Meh wott ich ned säge. Aber ich bin im Ham sin Ängel. Das Gefühl, för öpper de Ängel z'sii, noch dem was ich alles erläbt ha, das cha mer gar ned beschriibe. Sett ich i dere Gang bin, bin ich e neue Mönsch.</p>
Camden	<p>Camden. Camden Station.</p> <p>Mi Vater isch abghaue. Mini Muetter schaffed bi Ärzte ohne Grenzen. Zor Ziit im Irak. Irgendwie haut sie au immer ab. Aber das wörd sie nie zue gäh. Sie wott allne Bewiise, dass Chind ond Karriere prima onder ei Huet passid. Aber ohni mich.</p> <p>(Lichtkegel geht aus.)</p> <p>Hei, ich bi noni fertig!</p> <p>(Licht geht wieder an.)</p> <p>Ond denn han ich no das Foti gfonde. Mini Mum im Senegal mit eme Baby of em Arm. 15 Mönet isch sie det gsii. Ich binere Nanny. Das Foti hett mir ändgöltig de Stecker zoge. Jetzt bin ich fertig.</p>

Leyton	Leyton. Station Leytonstone. Mini Muetter hett ei Glaube. Sie glaubt a min Dad. Ond drom hett sie nie gseh, was dä mit mir gmacht hett. Klar, deför hett er mir alles kauft, was ich mir gwönscht han, solange ich gschwige han. «Bis ned ondankbar, Schätzeli», hett mini Muetter immer gseid. «En bessere Daddy wirsch nie gfinde.» Lieber kei Daddy als so eine.
Blue	Blue. Ich bin die Einzig ohni U-Bahn Stationsname. Mich hett d'C.G. vor em Ichaufszänter Blue Water gfonde, zmitzt i de Nacht - im Container bin ich gläge, wo alles Ässe landet, wo mer am Tag ned hett chönne verchaufe. Mini Eltere händ mich total überbehüetet. Ich ha gläbt wie im Gfängnis. Ich ha eifach müesse weg.
Marble	Marble. Marble Arch. Ich bin es Diplomate Chind. Min Brüeder isch ombrocht worde. Das isch es langi Gschicht. Denn han ich sälber en Morddrohig übercho. Gseid han ich nüt. D'Bulle ermittlid sowieso erscht wenn onderem Bode liisch. Drom bin ich ondertaucht. Am Afang isch es härt gsii, aber mer gwöhnt sich a alles.
Dolly	Dolly. Dollis Station. Einzelchind. Ich bin psychisch ned stabil. Das heisst, ich bin psychisch labil. Das Etikett chläbt do a minere Stirn. Ei Pfläger hett das usgnötzt. Ich erspare do d'Details. I de Gang stört mini Psyche niemer. Es hett doch jede e Flick ab, oder ned.
Black	(geht zu Water) Ond du?
Water	Mini Eltere händ sich vor zwee Täg la scheide. De Richter hett sie gfrogt, wer s'Sorgerächt för mich wott. Mini Eltere händ de Richter agstartt ond gschwige. Denn sind beidi ufgstande ond händ gseid: «Ich ned.» Als nöchschts isch min Stuel a Bode knallt ond ich bin os em Saal grennt. Ich bi scho immer förig gsii. (beginnt zu weinen.)
C.G.	(nimmt sie in den Arm) Wie wär's mit Water als Name?
Silver	Passt zo Träne.
C.G.	Nei, vo Waterloo Station dänk.
Freya	Schritt 2 vo de Gang Rules: Gägewart.

2.2 Gegenwart, die Regeln

Marble Regle Nommere 1:

Leyton	alli för eine, eine för alli. All for one, one for all.
Alle	All for one, one for all.
Blue	Regle Nommere 2:
Cristal	Alli Entscheidige werdid demokratisch troffe.
Dolly	Bestoht d'Gang os ere grade Azahl LÜüt, entscheidet s'Los dröber, wer ned darf abstimme.
Camden	Regle Nommer 3:
Black	En Entscheid wird vo allne akzeptiert. Au vo dene wo Nei gstomme händ.
C.G.	Regle Nommere 4:
Brix	Alles ghört jedem. Bi eus gitts kei Privatbsitz.
Freya	Regle Nommere 5:
Silver	Es neus Mitglied cha nor ufgnoh werde, wenn die folgende Kriterie erföllt sind:
Beth	A) Die Person isch wiiblich
Ham	B) Sonderregelig sitt em 28. Januar: Jongs nor in össerschte Usnahmefäll.
Silver	C) Wenn för die Person en Röckkehr is alte Läbe mit grosse Gfahre verbonde isch.
Bella	ond D) wenn d'Gang i de Lag isch, dere Person es sichers Läbe z'garantiere.
Mile	Jawohl. Das isch alles.
C.G.	(geht mit einem Kopfhörer zu Water.) Du leihsch dä a, während mir dröber råde, ob mir dich wänd ufnäh oder ned. D'Luutstärchi isch of em zähni fixiert.
Water	Aber ich chan au wieder goh. Ich wott doch ned scho wieder Problem mache.
	(Black und Freya verteilen in der Zeit die Lose, auf denen steht, wer nicht wählen darf.)
C.G.	Jetzt hocksch dich do he ond losisch <u>Punkmetall</u> bis ich dich erlöse.
Silver	Punkmetal, C.G. Mann, dini Ussproch isch illegaler als eusi Gang.
Water	Wenn das alles nor guet chonnt.
C.G.	Ich gebe zue, d'Lag isch scho eifacher gsii, aber dis Schicksal erföllt alli Pönkt vo de Regle 5. (setzt ihr den Kopfhörer)
C.G.	Ond vergiss ned, d'Hoffnig sterbt z'letscht.
Water	(zieht den Kopfhörer ab) Was?!
C.G.	Genau! (setzt ihr den Kopfhörer wieder auf und geht zu den anderen.)

2.3 Zukunft, Abstimmung

C.G.	Alles okay. <u>Punkmetall</u> Infusion laufft.
Freya	Do isch no diis Los.
C.G.	(nimmt es, öffnet es aber wie die anderen noch nicht.)

Mile
Camden Wie immer Gägeargument zerscht.
Ich weiss jetzt ächt ned was das sell. För was händ mir
abgstomme, dass 16 Mitglieder gnueg sind?

Black Ich als Gründerin schliesse mich de Camden voll a. Es goht do
om de soziale Friede. Je grösser mir werdid, desto komplizierter
wird alles. Das merkt doch jedi – ond jede.

Silver Bingo.
«Wachstum isch de Tod vom alles.»

Cristal Wer seid das?
Silver De Burak Oerkut.
Cristal En Türkische Schrifsteller?
Silver De Bsitzer vo de Döner Bude am Leicester Square.
Dolly För was händ mir über d'Grössli vo de Gang abgstomme? Die
Diskussion isch völlig onnötig. Wer jetzt för die Neu stimmt, isch
en Demokratiekiller! Ganz eifach.

Blue Ich ha es ganz praktisches Argumänt: Was d' Marble ond ich
täglich a Fuetter do äne schleppid, das überstiigt bi 17 Persone
eusi Möglichkeite.

Marble Aber die Neu chönnt eus doch hälfe.
Mile Marble. Zerscht d'Gägeargumänt.
Blue Denn wotsch z'Dritte go Dumpstere? Vell Vergnüege.
Leyton Krass schwierigi Situation. Ich wott kei Ongerächtikeite.
Einersiits isch es voll pervers, was ihre passiert isch, anderssiits
isch es pervers, dass mir die ganz Ziit abstimmid ond denn gliich
weder alles andersch möchid.

Mile Soscht no öpper?
(schaut sich um)
Okay.
Denn d'Befürworter.

Brix Mir händ all s'Glöck, i dere Gang zii. Bis hött händ mir no
niemer abgschobe oder ned ufgnoh. Wo isch eigentlich
euches Gwösse?

Angel Jo genau. D'Eltere händ sie abgestellt wie nes vergässnigs
Köfferli. Das isch doch ned normal. Dene chlämmt es Schloss!
Ond euch au!
(Reaktionen)

Mile Rüh jetzt!
Dolly & Camden Mir chlämmt doch...
(beide schauen sich an)

Camden Mir chlämmt doch keis Schloss!
Mile Fertig! Jedi Meinig wird aglost!
Dolly Das isch nüt als e Beschimpfig!
Mile Was isch denn de Demokratiekiller? Du hesch dir scho anders
müesse alose. Oder bruuchsch es Möschterli vo diim
ehemalige Pfleger?
(Dolly schweigt)

Marble Das wägem Ässe bsorge han ich scho vorhär gseid. Sie chönnt
eus hälfe ond euse Stress wär fascht halbiert, oder ned Blue.
Blue (zieht die Schultern hoch.)
Ham Jetzt tue doch ned eso. Dumpstere cha jede lehre. Ich find de
Vorschlag vo de Marble 1A.

Blue Denn hol diini Sonderwönsch in Zuekonft sälber.
Paprikaworscht, hot & spicy Ketchup, Edamer extra riif. Meinsch du eigentlich, das Züügs liit i jedem normale Container!

Mile Blue! Dis Argumänt händ mir scho vorhär ghört.
Wer no? Beth?

Beth Nei, isch okay. Computertechnisch chonnts ned drof a, oder Bella.

Bella Ned wöcklich. Es macht die Sach eifach no interessanter.
Mile Soscht no e Stimm?
Du no Freya?

Freya Ich bin sicher, mir schaffid das au mit einere Person meh. Aber es wird ned eifacher. Bestimmt ned.

Mile Denn machid euches Los uf. Wer ned darf abstimme bringt mir de Zättel ond enthaltet sich de Stimm.

(Ham erwischt das Los und bringt es Mile.)

Ham (zu Cristal)
Kei Glöck im Spiil, deför Glöck i de Liebi.

Cristal Oh Ham!

Mile Denn chömid mir zo de Abstimmig:
Wer degäge isch, dass mir die Neui i eusi Gäng «angry girls» ufnänd, streckt jetzt sini Hand uf.

(Camden, Blue, Silver, Dolly, Black, Mile)

Mile 6 NEI Stimme. Wer isch de deför?

(C.G., Cristal, Bella, Angel, Marble, Brix, stimmen dafür.)

Mile Au 6 Stimme. Glichstand.
Enthaltige?

(Beth, Leyton und Freya strecken auf.)

Black Das glaub ich jetzt ned! Freya, was sell das?!
Mile Rueh!
Ham. Bi Glichstand darf die Person entscheide, wo dors Los usgschlosse worde isch.

Ham Ab höt sind mir 17 Mitglieder!

(gemischte Reaktionen, C.G. geht zu Water. Die beiden umarmen sich.)

Brix Bevor ihr all gönd! Do sind no d'lisatzplän för morn wo d'Mile för eus gmacht hett.
(verteilt die Einsatzpläne.)

Leyton Water, du chonnsch morn mit eus. Erschti Lektion.
Water Erschti Lektion?

Leyton Kei Panik. Mit eus wird dir nüt passiere.

(alle gehen ab.)

2.4 Mile telefoniert

Mile nimmt das Handy zur Hand und tippt eine Nummer ein.

Mile Sergeant Miller? Morn om genau 09.12 Uhr stüigt a de Woodlane Station en wiibliche Teenager ii (Merkmale nennen) ond wird in Wage 3 Handtäsche plöndere. Nämied Sie sie fescht.

Wer ich bin? Spillt kei Rolle. Aber nämied Sie dä Hewiis ernscht.

(Black und Freya treten auf. Mile überspielt ihre Überraschung, dass die beiden zurückkommen.)

Black (zu Mile)

Was machsch denn du no do?

Mile Ich? Ich ha nor no kontrolliert, ob d'Angel mit dem Handy telefoniert hett.

Freya Ond? Hett sie?

Mile Nei. Aber ich loh's la verschwinde. Ned dass d'Bulle eus no of d'Spur chömid.

Black Das wär de absoluti Alptraum.

(Mile geht ab.)

Freya Ond was wotsch du jetzt no vo mir?

Black Freya. Isch dir eigentlich ned klar, dass mit de Water alles no schwieriger wird?

Freya Ich ha mich de Stimm enthalte.

Black Wieso hesch ned Nei gstomme?

Freya Wieso. Wieso. Wieso. Sett wenn bin ich dir Rächeschaft schuldig?

Black Sis. Mir händ die Gang zäme gründet. I mim Läbe gitts nüt Wichtigers.

Freya För mich doch au ned.

Black Du ond die Gang ihr... ihr sind de einzig Planet, won ich chan läbe. Ich wott ned, dass sich das alles plötzlich in Loft uflöst.

Freya Das wott niemer.

Black D'Mile hett grad hött Morge mit mir gredt.

Freya Ond?

Black Sie seid sälber, dass ihre d'Verantwortig langsam öber de Chopf wachst.

Freya Denn öbernimmsh halt du ihre Job.

Black Du weisch genau, dass ich mit miim Temparamänt ned för das gmacht bin. Das chlöpft nor. Ond mit minere erschte Amtshandlig flüügt de Ham i höchem Boge os de Gang.

Freya (schaut sie lange an.)

Wotsch du, dass ich...

Black ...überleg dir s'wenigschtens.
 Freya Black...
 Black ...du bisch es Gründigsmiitglied, hesch fame, bisch smart...
 d'Miss Perfect för dä Job.
 Freya Hör uf.
 Black Ich ha erscht grad agfange.
 Freya Ich weiss ned.
 Black Aber mit dir wörd die Gang garantiert wiiter existiere. Au wenn
 mir ned immer gliicher Meinig sind. Überleg dir's wenigschtens.
 Bitte.
 Freya (überlegt)
 Okay. Will's du bisch. Aber solange d'Mile no euse Chef isch...
 Black ...Oh Sis!
 (die beiden umarmen sich.)
 Black Ond versprich mir: Du bliibsch immer bi mir!
 Freya Klaro.
 (die beiden lachen.)
 Black Wo bisch morn iteilt?
 Freya Woodlane Station, Handtäschli – Diensch. Min Lieblingsjob.
 Ond du?
 Black Strossemusig am Kings Cross, mit de C.G. ond de Marble.
 Freya Tönt guet.
 Black Tönt sicher besser als mit dir.
 Freya I dem Fall sind mir gliicher Meinig.
 Black Chomm, mir gönd go penne. Gitt sicher wieder en stränge Tag
 morn.
 Freya Ond för mich e Huufe zom Nochedänke.

 (die beiden gehen ab.)

UMBAUMUSIK
 LICHTWECHSEL